

Evening Dogri News Bulletin,

26 June 2024 18:15 Hrs

Headlines

- ओम बिरला होरें गी दुई बारी लोकसभा दा अध्यक्ष चुनेआ गेआ ऐ। प्रधानमंत्री नरेंद्र मोदी, राहुल गांधी ते होरनें नेताएं उनेंगी मुबारकबाद दिती ऐ।
- डोडा जिले दी गंदोह सब डिविजन दे सिन्नू बजाड आले जंगलें च जारी टाक्करे च सुरक्षाबलें 2 आतंकवादिएं गी मारी मकाया ऐ। अभियान अजें जारी ऐ।
- एल.जी मनोज सिन्हा होरें आखेआ जे घरेलू सैलानिएं दी आदम च बाद्दा इस गल्लै दा सबूत ऐ जे सरकार सैलसफा खेत्तर दे विकास ते उद्योगें ते समुदायें बश्कार सांझ भ्याली विकसित करने गी किन्नी मती तरजीह देआ करदी ऐ।
- जम्मू दे डिविजनल कमिशनर रमेश कुमार, ए.डी.जी.पी आनंद जैन ते डिप्टी कमिशनर होरें अमरनाथ जात्तरा लेई ड्राई रन अभ्यास च हिस्सा लैता ते जात्तरा सरबन्धी बंदोबस्तें दा बी निरीक्षण कीता।

<><><><><><>

ते हन खबरें दी तफसील कन्नै विजय बजाज।

LS-Speaker

बीजेपी दे वरिष्ठ सांसद ओम बिरला होरें गी अज्ज इक बारी फही लोकसभा अध्यक्ष दे तौर पर चुनेआ गेआ ऐ। उनेंगी ध्वनिमत कन्नै चुनेआ गेआ ऐ कीजे बरोधी धड़ें नै इस औहदे लेई कांग्रेस सांसद के. सुरेश होरेंगी अपना मेदवार बनाया हा पर उनें सदन च वोटें दी बंडु आली मंग नेई कीती। चुनां दे बाद प्रधानमंत्री नरेंद्र मोदी, बरोधी धड़ें दे नेता राहुल गांधी ते संसदी कार्यमंत्री किरिन रिजिजू होर श्री बिरला होरें गी अध्यक्ष दे आसन तोहड़ी लेइये गे। एहदे शा पैहले अज्ज बडुलै जिसले सदन दी बैठक शुरू होई तां प्रधानमंत्री ते एनडी गठबंधन दे होरनें नेताएं श्री बिरला होरें गी अध्यक्ष दे तौर पर चुनने लेई प्रस्ताव पेश कीता जदकि बरोधी धड़े नै के. सुरेश हुंदे पक्ख च प्रस्ताव पेश कीता। अध्यक्ष चुने जाने पर बिरला होरें गी मुबारकबाद दिंदे होई प्रधानमंत्री होरें आखेआ जे बिरला

हुंदे दुई बारी चुने जाने पर अज्ज इतिहास बनी गेआ ऐ। उनें आखेआ जे सदन अगले 5 बरे उंदे मार्गदर्शन हेठ कम्म करोग। उनें आखेआ जे सांसद दे तौर पर बिरला हुंदे कम्म नमें सदस्ये दा दिल बधांगन। तोआई बरोधी धडे दे नेता राहुल गांधी होरे ओम बिरला होरे गी मुबारकबाद दिंदे होई आखेआ जे एह सदन लोके दिएं आसे-तांगे दी नुमाइंदगी करदा ऐ। उनें जकीन दोआया जे बरोधी धडा संसद गी बवस्थित ठंगै सिर चलाने आला अपना सैहयोग देग। उनें आखेआ जे सदन च बरोध दिआं अवाजां बी बुलंद होन दित्तियां जानियां लोडचदियां ना समाजवादी पार्टी दे नेता अखिलेश यादव होरे मेद जताई जे बरोधी धडे गी अपन गल्ल रक्खने दा सुद्दा मौका थहोग। अपने संबोधन च श्री बिरला होरे परतियै सदन दे अध्यक्ष दे तौरा पर कम्म करने दा मौका देने ते उंदे पर विश्वास करने लेई सब्बने सदस्ये दा धन्नवाद कीता। उनें आखेआ जे संसदी कदरे ते लोकतांत्रिक परम्पराएं गी समृद्ध बनाना उंदी प्राथमिकता होग। उनें आखेआ जे पिछले दहाके च लोके दिआं आसां-तांगां बधिया न ते एह सब्बने सांसदे दी सांझी जिम्मेदारी ऐ जे ओह इनेंगी पूरा करने लेई किट्टे रलियै जत्त करन। बिरला होरे सदस्ये गी आखेआ जे ओह सार्थक चर्चा करन ते जेगर बरोध बी करना ऐ तां सदन दी गरिमा गी बरकरार रक्खदे होई गै बरोध करन।

<><><><><><>

Doda-Encounter

डोडा जिले दी गंदोह सब डिविजन च बजाड आले जंगली इलाके च अजज बडुलै सुरक्षाबले ते आतंकवादिएं बशकार टाक्करा शुरू होआ। स्हाडे जिला संवाददाता फैयाद पाम्पोरी मुजब सुरक्षाबले 2 आतंकवादिएं गी मारी मकाया ऐ ते अजे बी किश आतंकवादी उत्थे छप्पे दे न। सूत्रे मुजब बडुलै कोई 9 बजे सुरक्षाबले सिन्नू पंचैत दे बजाड जंगले च तपाशी अभियान चलाया जेहडा तौले गै टाक्करे च तब्दील होई गेआ। पुलस सूत्रे मुजब आतंकवादिएं दे सफाए लेई आधुनिक तकनीके दा इस्तेमाल कीता जा'रदा ऐ।

<><><><><><>

PM-Emergency

प्रधानमंत्री नरेन्द्र मोदी होरे आखेआ ऐ जे उनेंगी इस गल्लै दी खुशी ऐ जे लोकसभा अध्यक्ष ओम बिरला होरे अज्ज एमरजेसी दी सख्त निंदेआ कीती ते उस दरान कीते गेदे जुल्मे पर लो पाई ते लोकतंत्र दी जिस तरीके हत्तेआ कीती गेई ही, ओहदा बी जिक्र कीता। सोशल मीडिया दी इक पोस्ट च श्री मोदी होरे आखेआ जे एमरजेसी 50 बरे

पैहले लाई गई ही पर एह जरूरी ऐ जे अज्जै दे नौजवान बी एहदे बारे च जानन कीजे एमरजेंसी दे दरान संविधान गी मिंदियै जनता दी राय गी दबाई दित्ता गोआ हा ते संस्थानें गी बी तबाह करी दित्ता गोआ हा।

<><><><><><>

TMC-Rijiju

लोकसभा अध्यक्ष दे चुनां दरान वोटें दी बंड आली मंग गी अस्थाई स्पीकर हुंदे आस्सेआ मंजूर नेई करने दे आरोपें गी खारिज करदे होई संसदी मामलें दे मंत्री किरिन रिजिजू होरें दावा बन्नेआ ऐ जे बरोधी धड़ें आस्सेआ इस बारै कोई औपचारिक मंग नेई कीती गई ही। संसद बाहर पत्रकारें कन्नै गल्ल करदे होई रिजिजू होरें आखेआ जे सरकार वोटें दी बंडु आली बवस्था आहनना चाहंदी ही। हालांकि ध्वनिमत दे दरान जिसले अध्यक्ष दे औहदे लेई चुनां होआ तां बरोधी धड़े नै कुसै किस्मै दी कोई औपचारिक मंग नेई कीती।

<><><><><><>

Shah-Om Birla

केंद्री गृह मंत्री अमित शाह होरें ओम बिरला होरें गी इक बारी फही लोकसभा दा अध्यक्ष चुने जाने पर मुबारकबाद दित्ती ऐ। सोशल मीडिया दी इक पोस्ट च शाह होरें आखेआ ऐ जे संसद लोकतंत्र गी सशक्त बनाने च बिरला हुंदी मिसालजोग बचनबद्धता भारती संविधान ते एहदे च दस्सी गेदी मुल्लें-कदरें गी होर बल देंगन।

<><><><><><>

SSR-Voter List

मतदाता सूचिएं दी विशेष नजरसानी अज्ज कौला शुरू होइये 24 जुलाई तोड़ी जारी रौहग। इस दौरान मतदाता अपनी आपत्तियें ते दावें गी 25 जुलाई थमां 9 अगस्त तोड़ी दर्ज कराई सकदे न ते प्रस्तावें लेई 19 अगस्त तोड़ी बलगेआ जाग। पिछले लोकसभा चुनाएं दे मकाबले च मतदान केंद्रें दी गिनतरी बदाई जाग। हर मतदान केंद्र पिच्छे 1500 मतदाताएं कौला मते होने दी सूरतै च दऊं मतदान केंद्र खडेरने दे प्रावान कीत जांगन। पैहली जुलाई 2024 गी इक खाके आहली लिस्ट तैयार कीती जाग। दावें ते ऐतराजें गी हफ्ते दे अखीरै च दिक्खंगन ते सुनंगन। तोआई सुप्रीम कोर्ट नै सितंबर 2024 तोड़ी असेंबली चुनां जरूरी कराने बारै आखेआ ऐ।



ते हन बाकी दिएं खबरें कन्नै शिवि सूरी।

LG-Tourism

उपराज्यपाल मनोज सिन्हा होरें आखेआ ऐ जे प्रधानमंत्री नरेंद्र मोदी हुंदी अगुवाई च जम्मू-कश्मीर नै अंतरराष्ट्रीय दिलचस्पी इत भेठा खिच्ची ऐ जिसले के जम्मू-कश्मीर दी जात्तरा लेई मकामी सैलानियें दा हौसला बी जात्तरा गितै बदाया ऐ। इस बदलाव नै मकामी समुदाय समृद्ध होआ रदा ऐ ते अज्जै-कल्लै दा सैलसफा आहला उद्योग बनाने च बी मददगार होआ रदा ऐ। उपराज्यपाल होरें जम्मू-कश्मीर सैलसफा विकास सरबन्धी कन्क्लेव गी संबोधित करदे होई आखेआ जे जम्मू-कश्मीर गी विश्व च सब्बनें शा इक मशहूर सैलानी थाहर बनाने लेई टिकाऊ सैलसफा आहला नमूना बनाने लेई प्रयास कीते जा रदे न। उनें आखेआ जे कोविड महामारी दे बाद प्रदेश च साल दर साल विदेशी सैलानियें दी गिनतरी च बी बाद्दा होआ रदा ऐ। इस मौके उद्योग जगत दे शीर्ष व्यक्ति, फिल्म उद्योग ते बपार ते जात्तरा प्रबन्धन एजेंसियां बी उत्थे मौजूद हियां।



Dry Run Sanjay

श्री अमरनाथ जी दी जात्तरा लेई जम्मू दे डिविजनल कमिशनर रमेश कुमार, एडीजीप आनंद जैन, जम्मू दे उपायुक्त ते होरनें वरिष्ठ अफसरें जात्तरा गितै इक पूर्वाभ्यास कीता ते जात्तरा गी सुचारू ढंग्गै ते सुरक्षा नै करवाने गितै तैयारियें दा जायजा लैता। इस मौके जम्मू दे उपायुक्त सचिन कुमार वैश्य होरें आखेआ।



SANBY-Udh Meet

औंदी अमरनाथ जी दी जात्तरा लेई तैयारियें गितै उधमपुर-रियासी रेंज दे पुलस दे डीआईजी रईज़ मोहम्मद भट्ट होरें इक सुरक्षा बैठक दी अध्यक्षता कीती ते जिला उधमपुर च श्री अमरनाथ जी दी जात्तरा दी तैयारियें दा जायजा लैता। बैठक च एसएसपी उधमपुर, कमांडेंट 137 बटालियन सीआरपीएफ ते पुलस थमां होरनें अफर, फौज, आईटीबीपी, सीआईएसएफ, जीआरपी ते होरनें सुरक्षा बल इस च शामिल होए। डीआईजी होरें सब्बै हितधारकें बश्कार आपूं च नेडमें तालमेल दी जरूरतै पर बल दित्ता तां जे यात्रुएं दी सुरक्षा गी यकीनी बनाया

जाई सकै। डीआईजी होरें यात्रा दौरान सौहगा रौहने दे बारे आखेआ। उनें अफसरें गी रोज दी बिनाह पर जायजा लैने, व्यापक सत्र लाने दे बी निर्देश दित्ते।

<><><><><><>

IDDA-Reasi

रियासी दे जिला प्रशासन नै समूलचे जिले च अज्ज नशाखोरी ते गैर कनूनी तरीके नै तस्करी खलाफ अंतरराष्ट्रीय ध्याडा मनाया। मुख कार्जक्रम डीसी दफ्तर परिसर दे आडीटोरियम च होआ। इस कार्जक्रम दा आयोजन मुतलका विभागें नशामुक्त भारत अभियान दे नोडल विभाग, समाज कल्याण विभाग कन्नै रलियै कराया गेआ। इसा मौके विशेष महाजन होर कार्जक्रम च मुख परौहने हे। उनें आखेआ।

<><><><><><>

Met-J&K

अगले त्रऊं-चऊं दिनें च उत्तरी भारत दे ज्यादातर हिस्से ते बिहार, बंगाल, छत्तीसगढ़, राजस्थान, मध्य प्रदेश, गुजरात ते उत्तरी अरब सागर दे बाकी हिस्सें च दक्खन पच्छिम मानसून दे अगगे बदने लेई माहौल साजगार ऐ। भारती मौसम विभाग नै आखेआ ऐ जे कल तोड़ी कोंकण, गोवा, तटीय कर्नाटक, केरल ते तमिलनाडू च मती गै भारी बरखा जारी रौहगा। इये नेय हालात अगले त्रऊं-चऊं दिनें लेई उत्तर पूर्वी भारत, पच्छिम बंगाल, सिक्किम, बिहार ते ओडिशा च बी जारी रौहंगन। तोआई राष्ट्रीय राजधानी दे बक्ख-बक्ख हिस्सें च हल्की बरखा होने दी मेद ऐ। भारती मौसम विभाग नै गर्म हवा आहले हालात ते लू उप्पर आखेआ जे अज्ज तोड़ी पंजाब च एहू हालात जारी रौहगा।

<><><><><><>